

Friûl di Jevât

PAR CURE DA LA SOCIETÂT FILOLOGJICHE FURLANE

Vie Ascoli, 1, Guriza - tel./fax 0481533849 - gorizia@filologicafriulana.it - www.filologicafriulana.it

Il Santuari di passe sîs secui al è il lûc di incuintri par furlans, carinzians e slovens

Un Santuari pai popui d'Europe: cheste e je la Mont Sante di Lussari, dongje Tarvis (Svete Višarje par sloven e Luschariberg par todesc), indulà che sabide ai 25 di Lui al è stât il tradizional pelegriñaç li che si dan dongje fedêi dal Friûl, da la Carinzie e da la Slovenie. Dilunc di passe sîs secui di storie no si son mai fermâts i pelegriñaçs al Santuari, lûc di incuintri jenfri lis trê grandis fameis lenghistichis europeanis che si dan adun intun puest unic là che si dis Messe in trê lenghis diviersis.

Sabide stade, su la splanade daûr di chest piçul borc alpin incoronât jenfri lis Alpis Juliis, a àn dit Messe cuatri vescui: bons. Andrea Bruno Mazzocato, arcivescul di Udin, bons. Stanislav Zore, di Lubiane, bons. Jurij Bizjak, di Cjaldistrie e bons. Josef Marketz, di Gurk-Clanfurt.

"I popui europeans a puedin vê in mè une sperance di unitât e di solidaritât l'un cul altri se ducj si ricognossin fis di Diu" al à dit te predicje bons. Mazzocato, che al à ricuardât ancje che "di 660 agns incà il santuari di Mont Sante di Lussari al è un segnâl di unitât juste tal cûr dal continent european. Al è il santuari 'dai trê popui' che vie pai secui a àn fat sù l'Europe; diferents l'un di chel altri par lenghe e



Pelegriñaç dai trê popui a la Madone dal Lussari

Esortazion dal Vescul di Udin aes Glesiis, par che a cressin in comunion e a sedin sorzint di unitât inte Europe dal tierç mileni

tradizions, ma unîts in grazie da lis lidrîs cristianis che ju lee ducj tra di lôr, come che nus ricuarde chest santuari. O sin culi par preâ Marie, Mari da la unitât, par dute l'Europe che e je daûr a vivi un moment une vore delicât e decisif, che al pues rinfuarcî o pûr disdrumâ la sô unitât". Propit par chest bons. Mazzocato al à volût dâ une esortazion a

lis Glesiis, par che a cressin "inte comunion tra di lôr" cussì di jessi "une sorzint feconde di unitât par dute l'Europe dal tierç mileni" e ai "politics e aministradôrs che in chest moment a son clamâts a guviernâ i destins dai lôr popui. Ur tocje a lôr - al à dit cun fuarce - di difindi e rinfuarcî il grant progjet di une Europe unide tant che une sinfonie

Preinle - al à dit in conclusion bons. Mazzocato - par che cheste prove che il coronavirus nus à metût davanti e rapresenti un passaç di purificazion che al rinove intes popolazions europeanis la linfe da la fede cristiane; chê linfe che di cetancj secui incà e cjate tal Santuari di Mont Sante di Lussari un ferâl che al fâs lûs sul cunfin dai trê popui".



(COSTANTE INTUN MOMENT DI POLSA)

Lera nassût come Costante Anzile; 'l è muart come Costante Mulinâr, ultin mulinâr di Visc, testemoni dal gambiâ dal lavôr pai contadins dopo da uera. Fin a un zincuanta ains fa, al mulin 'l era un lûc una vora cognossût: propi là si lava a masanâ la blava pa polenta e 'l forment pal pan e ancja si cjararavi da vita, si cumbinavin afârs. I bêz erin dome tai siums, no 'nd erin, tai tacuins i coreans si tocjavin, e cussì una part, la "mundura", gi lava al mulinâr. Cuan che era ora di bati al forment, e i cjar erin un daûr di chel altri, incolmenâts di balz, Costante al sgorneava di e gnot: la trebia inglutiva i balz di forment; la pressa sburtava fûr balis di stram; un tubo

al spudava la bula che si ingrumava alta, e al forment al coreva tal sac.

Tanta int intor, tanta fadia, tant polvar, tanta speranza! Costante al veva viodût la lûs dal mont a Pucinia, tal 1915. Di chê' bandis la aga no mancja: aga e tiara a somein sposadis, cu la fumata a fâ di testemoni... D'instât, cuant che si podeva - a contava di lui la sô femina "Delma" - 'l era simpri a nadâ a svuacârâ. Ancja so pari 'l era mulinâr, si che duncja lui, za di frut, 'l à scomenzât a vuadagnâsi al pan a Cjarmassis di Teor. L'aga era la sô passion; là drenti 'l era come al pes o al crot. Difati, tal traghet di Pucinia a Cjarmassis, gi à salvati li' plumis a pi di un che al stava pa là sota. Tal '29, 'l à tirât sù un che 'l gjavava gleria tal Stela e, par chist, 'l à vût la medaia d'arint da Fondazion Carnegie e un brao di banda dal Ministeri dai Internos talian.

Al sunava al clarin, al saxofono e di frut par lâ a scuella di musica a Prissinins, prima di fâsi imprestâ la bici da massaria dal mulin, al doveva partâgi una sglavinada di seglots di aga. Ta vita, 'l à zirât di mulin in mulin: Cjarmassis, Teor, Rivignan, Flumisel, Cjamlunc e Visc. La miseria gi coreva daûr, tacada di lui come la ombrena, tant che, a Flumisel, 'l à dovût vendi al

saxofono par podê comprâsi un vistî!

Ma cuant che era l'ora di fâ festa, no si tirava mai indaûr. Rivavin i fradis, ducj sunadôrs, e via par ogni cjanton a sunâ e cjantâ a plena cana. Una volta gi à capitadi un incident di chei di chilo: duta la int diseva che 'l era za muart e tornât di ca justa par meracul. Apena savuda la gnova, so copari Ugo Moro, un sensâl di gala, plen di spirt, 'l è curût sburît là di lui par savê ze mût che erin li' robis tal adilà: "Copari - gi à contadi Costante - brutononon! Dome debits e gambiâls!". Un'altra sô passion era chê da motos. E 'nd à vudis dôs: una BSA '500 e una Guzzi 250. Pizzul, gnarvicul, plen di bon timp, e fuart come un rôl, al partava sacs di cuintâl come se al fos di mangjâ pastasuta.

'L à tant lavorât, di di e di gnot, fin che un altri incident su la strada lu à butât par tiara e lu à fat patî par una vora di ains. Di sigûr, cuant che 'l è lât cun Diu, al Signôr gi à preparadi un cjar, cu li' rauedis basis, blanc di farina, tirât dai mûi e gi à diti "gie!". E i mûi son parûtis, cun Costante parsora, fra sacs pizzui e grancj, di blava, forment, farina, noli e semula, par lâ intun lûc indulà che li' gambiâls a son indoradis pardabon par cui che 'l à sgorneât, come lui, ta vita!

Ferruccio Tassin